

# Maletgs murals a cultira tumleastgegna

Das purschidas digl «Luvratori digl Mester da Vuorz» an Tumleastga

■ (cp) Igl Mester da Vuorz â stgafieu las sias ovras an 16 liacs agl Grischùn. An la tgapluta da sontga Maria Madlagna a Dusch sur Pasqual satgatan frescas ca raquentan szenas ord la veta da Maria Madlagna. Sen la pare da fora satgata, sco a Ziràn, egn grànd maletg da san Cristoffel. An que liac an Tumleastga sa konzentreschan tutas qualitäts digl Mester da Vuorz: Ovras d'art meisterilas da la gotica tardiva, peia picturas muralas an conex cun architectura medievals realisada an egna cuntrada tut aparti. D'admirar la sia ovra agl liac e egn evenimaint d'art c'e ple impressiuant c'egna visita an egna galareia.

Igl «Luvratori Mester da Vuorz» vut intermediar gest que evenimaint d'art cun la sia retscha da «a la tschéartga da stgazis». Durant quater sondas agl curs digl avust a digl setember pon ign visitar quater liacs cun frescas digl 14avel

tschantaner. Igl 17 d'avust explitgescha la mediatura da cultura *Susanne Hessenbarth* igls maletgs an la tgapluta da Dusch. Ella sa betga me da raquintar blear a vivameing sur digl cuntegn da quels maletgs, mobagn ella ancanuscha ear bagn la tecnica da malagear a sa novas davart las relaziuns istoricas ad artisticas digl Mester da Vuorz. La guidada antscheva a las 15.00. Ign s'antupa avànt la tgapluta. La guidada custa otg fràncs. Daple infurmaziùns davart l'antier «tscheartga da stgazis» en d'andriescher a [www.waltensburger.ch](http://www.waltensburger.ch)

## Mussar la cultura a la cultira

Infurmaziùns davart la cuntrada, noua c'igl Mester da Vuorz eara activ, porscha l'excursiùn «Cultira». Quell'excursiùn d'egn gi antscheva a las 10.00 tier la farmada da la posta a Pasqual. Ella magna passànd Dusch a Farschno. An que conex

tradescha *Ruedi Küntzel*, igl manader da la Tgea Stoffel, blears fatgs interessànts sur da Pasqual ad igl martgieu medievals da Farschno. Là satgata la Tgea Stoffel (oz museum regiunal da la Tumleastga) cun picturas muralas profanas madameing digl 14avel tschantaner, las qualas el preschainta da la sia maniera eloquenta. Trànter Pasqual a Farschno viandesch'ign tgientschameing sen veias da furs. Sen que tur survignan ign anvesta an la cultira singulara da la Tumleastga. An la stizuneta digl bagn da Dusch e'gl pussevel da saproviantar cun products locals par far marena pintga sper la tgapluta. L'excursiùn «Cultira» â liac duas geadas, igls 23 d'avust ad igls 21 d'october. Ella custa 95 fràncs par parsùna, inclus la guidada, l'antrada ad igl apero an la Tgea Stoffel da Farschno. Las anunzntgas en da drizar a [www.waltensburger.ch/angebot](http://www.waltensburger.ch/angebot)

Igl «Luvratori Mester da Vuorz» vut far ancunaschainta ad egna vasta publicitad l'ierta culturala digl Mester da Vuorz, culiànd quella cun cultura a cultira digl Grischùn. El vut intermediar las ancunashentschas actualas da la parscurtaziùn davart igl Mester da Vuorz da maniera creativa a culturevla. La sia purschida cumpeglia guidadas an baselgias, excursiùns d'egn near plirs gis, curs a luvratoris practics.

## Excursiùns an Tumleastga:

17 d'avust a las 15.00 igls maletgs murals an la tgapluta da Dusch cun *Susanne Hessenbarth*, 23 d'avust ad igls 21 d'october a las 10.00 davent da Pasqual excursiùn atras la cultira tumleastgegna cun *Ruedi Küntzel*.



Egna scena or digls maletgs murals da la tgapluta da Dusch davart la veta da la sontga Maria Madlagna.

FOTO G. DIETRICH